

REGLUGERÐ

um starfsábyrgðartryggingar endurskoðanda.

1. gr.

Endurskoðandi sem starfar við endurskoðunarstörf sbr. 7. gr. laga nr. 18/1997, um endurskoðendur, er skylt að hafa í gildi starfsábyrgðartryggingu hjá váttryggingafélagi sem hefur starfsleyfi hér á landi vegna fjárhagstjóns sem leitt getur af gáleysi í störfum hans eða starfsmanna hans. Leggi endurskoðandi inn réttindi sín, fellur váttryggingaskyldan niður.

Váttryggingin skal nema minnst 5.000.000 króna vegna hvers einstaks tjónsatviks. Heildarfjárhæð váttryggingabóta innan hvers árs skal nema minnst 15.000.000 krónum. Fjárhæðir þessar skulu miðast við vísitölu neysluverðs 181,7 og breytast 1. janúar ár hvert í samræmi við breytingar á vísitölunni.

Váttryggingin skal taka til starfa endurskoðandans hvar sem er innan Evrópska efnahagssvæðisins.

2. gr.

Heimilt er að áskilja sjálfsáhættu váttryggingataka í váttryggingaskilmálum, en slíkt má ekki skerða rétt þriðja manns til bóta úr hendi váttryggingafélags. Tilhögun eigin áhættu skal getið í váttryggingaskilmálum, váttryggingaskírteini eða iðgjaldskvittun.

3. gr.

Falli starfsábyrgðartrygging úr gildi skal hlutaðeigandi váttryggingafélag tilkynna það váttryggingataka og fjármálaráðuneytinu þegar í stað. Váttryggingatímabili telst ekki lokið fyrir en liðnar eru átta vikur frá því að váttryggingafélagið tilkynnti váttryggingatakanum og fjármálaráðuneytinu sannanlega um váttryggingaslit, nema önnur fullnægjandi váttrygging hafi verið tekin.

Verði bótaskyld tjón, sem fellur undir starfsábyrgðartryggingu samkvæmt reglugerð þessari, ber váttryggingafélagi að tilkynna um hið bótaskylda atvik og greiðslu vegna þess til fjármálaráðuneytisins.

Váttryggingafélagi er heimilt að endurkrefja hvern þann sem veldur tjóni af stórkostlegu gáleysi.

4. gr.

Þar sem tveir eða fleiri endurskoðendur starfa saman með sameiginlega starfsstofu og bera óskipta bótaábyrgð á störfum hvors/hvers annars, geta þeir fullnægt váttryggingaskyldu sinni með því að leggja fram sameiginlega váttryggingu enda komi nöfn þeirra beggja/allra fram í váttryggingaskjali. Skulu þá lágmarksfjárhæðir skv. 1. gr. hækka um a.m.k. 10% fyrir hvern endurskoðanda umfram einn.

5. gr.

Uppfylli endurskoðandi ekki skilyrði reglugerðar þessarar um starfsábyrgðartryggingu er honum skylt að leggja inn réttindi sín og er honum þá óheimilt að taka að sér störf sem endurskoðandi.

6. gr.

Allir váttryggingaskilmálar sem reglugerð þessi tekur til skulu látnir fjármálaráðuneyti og Váttryggingaeftirliti í té áður en þeir eru boðnir endurskoðendum.

7. gr.

Reglugerð þessi er sett samkvæmt heimild í 10. og 22. gr. laga nr. 18/1997, um endurskoðendur, og öðlast þegar gildi.

Ákvæði til bráðabirgða.

Eigi síðar en 31. desember 1997 skulu váttryggingaskyldir endurskoðendur afhenda fjármálaráðuneytinu staðfestingu um að þeir hafi í gildi starfsábyrgðartryggingu, sem uppfyllir skilyrði reglugerðar þessarar.

Fjármálaráðuneytinu, 5. desember 1997.

F. h. r.

Magnús Pétursson.

Ragnheiður Snorradóttir.

AUGLÝSING

**um staðfestingu á breytingu á skipulagsskrá fyrir Samvinnuháskólann
nr. 73 31. janúar 1990, sbr. breytingu nr. 498 11. september 1995.**

Skólanefnd sjálfseignarstofnunarinnar Samvinnuháskólinn hefur samkvæmt heimild í 10. gr. skipulagsskrár stofnunarinnar samþykkt eftirfarandi breytingu á skipulagsskránni:

1. gr.

2. gr. orðist svo:

Markmið Samvinnuháskólans er að efla og styrkja íslenskt atvinnulíf og samfélag sem fagháskóli með því að veita framúrskarandi fræðslu á sviði viðskipta og rekstrar. Þá skulu við háskólann fara fram rannsóknir á íslensku atvinnu- og viðskiptalífi er m.a. beinist að mismunandi rekstrarformum, lýðræði í atvinnulífi og atvinnurekstri, viðskiptasiðferði og umhverfismálum.

Við þjálfun og fræðslu skal Samvinnuháskólinn leggja sérstaka áherslu á raunhæf verkefni, tengsl við atvinnulífið, alþjóðleika, upplýsingatækni, samvinnu, hópstarf, samskipti og samskiptafræðslu, skapandi og gagnrýna hugsun. Samvinnuháskólinn skal jafnframt þjálfa nemendur með tilliti til frumkvæðis, aðlögunarhæfni og sveigjanleika, vinnu, ákvarðanatöku og forystu í hópum.

Ofangreind breyting á skipulagsskrá fyrir sjálfseignarstofnunina Samvinnuháskólinn staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá nr. 19/1988.

Dóms- og kirkjumálaráðuneytinu, 27. nóvember 1997.

F. h. r.

Jón Thors.

Fanney Óskarsdóttir.